

悲愍為莖智慧葉 三昧為鬚解脫敷
菩薩蜂王食甘露 我今敬禮佛蓮華

慈悲地藏懺法卷中

一切諸佛。愍念眾生。為說慈悲地藏懺法。今當皈命。一切諸佛。

南無釋迦牟尼佛	南無阿彌陀佛
南無當來彌勒佛	南無山王佛
南無智勝佛	南無淨名王佛
南無智成就佛	南無無上佛
南無妙聲佛	南無滿月佛
南無月面佛	南無三世諸佛
南無文殊師利菩薩	南無普賢菩薩
南無觀世音菩薩	南無普廣菩薩
南無虛空藏菩薩	南無金剛藏菩薩
南無地藏王菩薩	

南無懺摩會上佛菩薩（三稱）

慈悲地藏懺法卷中

禮諸佛已。次復懺悔。上來略懺煩惱障竟。惑障清淨。業因不繼。業無偶匹。造罪何由。次當懺悔業障。業相雖多。有漏無漏。黑白撿之。收無不盡。然佛言五戒。儒說五常。常戒雖殊。體本元一。克己復仁。慈心不殺。見利思義。不與

不取。非禮不視。寧許奸邪。言可翻覆。信則斷金。嗜酒滅身。妄言敗德。堅持常戒。人道無虧。此五善業。有漏同名。以不能超越同居界故。復有勝倫。不惟慳己。以物惠他。不特不殺。性嗜好生。雖未離淫。進止有節。讚美十善。歎護一乘。攝散精勤。修未到定。果感地居。主小千界。報似勝人。皆歸有漏。更復有人。厭欲苦羸。欣色淨妙。修四種定。感十八種天。雖伏煩惱。尚未斷滅。色漏未除。復有深機。厭色牢籠。盡識歸空。觀空想滅。以無所處。滅盡頂天。壽經沙劫。復墜輪迴。未獲無生。亦名有漏。如向若人若天。雖修善業。不出輪迴。俱名黑業。若修禪觀。依止觀空。始五停心。總別相境。身受心法。次第觀成。行三十七品之助道。觀一十六行之正修。破八十八之見使。得證見道。除九十一之思惟。身證無生。心境寂滅。以證偏空。離五蘊山。出生死海。居涅槃頂。於法無為。不得度生。未名菩薩。若於中乘因緣體法。從無明緣行。乃至憂悲苦惱。自無明滅。憂悲苦惱亦滅。如是順逆體法。惑寂智滅。疾證無為。病在無機。並收小果。若夫菩薩名大乘者。自身未度。先度眾生。發僧那於始心。終大悲而赴難。廣行六度。功越三祇。修漏無漏之慧業。獲生無生之慈悲。開佛見知。證極自性。合本有之靈明。悟心地之秘藏。心佛眾生。同歸三德而已。奈我等所以不能解脫者。皆由性識無定。逐境生心。染習結業。淨習結果。為善為惡。曾未暫停。輪迴五道。徧歷四生。動經塵劫。迷惑障難。如魚遊網。將逝長流。脫或暫出

。又復遇網。但因妄見。妄習發生。郵傳三界。旅邸四生。出沒不停。自招劇咎。皆由十種妄習。不得解脫。云何為十。一者淫習交接。二者貪習交吸。三者慢習交陵。四者瞋習交衝。五者詐習交誘。六者誑習交誣。七者怨習交嫌。八者見習交明。九者枉習交加。十者訟習交誼。由斯十習。造十惡果。皆由六根。種種構造。致地獄報。六根交受。以是因緣。故當懺悔。

第一先懺淫習者。男女根境。交接相磨。研磨不止。搖動根塵。汝憐我色。我愛汝心。日月歲深。轉復尅瘵。眠夢不安。身肢疼痛。慘悽不樂。臨欲命終。父母妻孥。恫傷死別。亡者神識。晝夜長行。去無遮止。即身應受。業報鐵床。經劫受苦。無量無邊。是故諸佛色目行淫。同名慾火。菩薩見淫。如避火坑。我與眾生。無始來今。而元不知。遠離色欲。避淫火坑。於內外境。男女身分。迷色迷心。廣造醜業。自破淨戒。毀他性遮。恥他門戶。壞賢節名。不男不女。五種非人。或比丘尼。亦嗜欲習。造地獄因。受無量苦。故於今日。恭對聖賢。剖露披陳。求哀懺悔。願十方佛。地藏能仁。傾甘露水。湔除罪垢。使我無始欲習。化為尸羅淨緣。究竟菩提。成就戒德。登歡喜地。永截輪迴。

第二懺悔貪習者。貪習業現。發於相吸。吸引不止。滋蔓貪根。猶如磁石。鐵鍼同倫。知足之人。雖貧亦樂。不知足者

。富更愈求。殊不知富招極禍。喪家失命。眷屬分離。更有三緣。不求自至。或遭水火。無妄橫罹。或生逆子。弛法凋殘。消瘦家園。苦等剜肉。縱能善禦。耗散無期。是故諸佛色目多求。同名貪水。菩薩見貪。如避瘴海。我與眾等。無始來今。而全不知。多求多苦。不離瘴海。輕重寶物。利祿公私。枉騁馳求。相吸惡取。劫奪剽掠。橫毒良民。於三寶財。混亂雜用。托公私益。偷越關津。盜竊銖銖。欺瞞圭合。以麤易好。以短換長。巧計百端。希望毫釐。益我貪心。貪得無厭。至受輪迴。故我今日。懇佛哀憐。受我懺悔。所有貪業。皆悉消除。乘斯禮懺功德。增伊檀度焚熏。以此勝因。滿波羅蜜。究獲淨心。登離垢地。

第三懺悔慢習者。慢習交陵。發於相恃。馳流不息。騰逸奔波。無明海闊。積水貪深。如人口舌。自相綿味。因而水生。彼此相鼓。累劫成仇。相攻辯駁。訟及經生。死有血湖。灰河。熱沙。洋銅灌口等報。是故諸佛色目我慢。同名癡海。菩薩見慢。如避巨溺。我及眾等。無始至今。而渾不知癡慢水溺。隨世八風。波浪千疊。漂生死海。沉慢見河。張憍慢帆。入無明流。泳洋沉淪。無有出口。又復或恃種性。憍慢餘人。或以聰明。輕欺後學。乃至未得謂得。未證謂證。妄竊道器。訛述後生。如是等慢不可具說。恭對三寶。悉皆懺悔。願我靜慮。圓成忍波羅蜜。越慢溺海。登涅槃山。發智光明。入一乘地。

第四懺悔瞋習者。瞋習交衝。發於相忤。忤結不息。心熱發火。鑄氣為金。闔生惡業。生有刀輪劍戟。斧鉞鋸鎗。是生衝怨。殺氣飛動。瞋習相擊。則有宮劓斬刑。剉刺搥擊等報。是故諸佛色目瞋恚。同名刀劍。菩薩見瞋。如避誅戮。我與眾等。無始來今。而曾不知瞋恚惡習。攬斯交衝。師瞋弟子。弟子瞋師。父母六親。姻戚故舊。鄰里鄉黨。更互相衝。紊然較計。誓不和諧。不念自無慧力。彼有福緣。妄爭高下。競結怨仇。自有愆尤。多方文飾。他眚過失。廣為簸颺。如是瞋恚無量無邊。故我今者。恭對聖賢。所有瞋習。悉皆懺悔。精進止觀。成波羅蜜。燄慧增明。證無上道。廣與眾生。同登四地。

第五懺悔詐習者。詐習交誘。發於相掉。相嘲不住。引起煩惱。如水浸田。稗莠生長。荒蕪良稼。善穀不生。詐習相延。是非空構。矯設異議。罔冒豪雄。彈壓彼此。欺詐自他。曲媚時宜。相加枉直。則有杻械枷鎖。杖笞棒撻等報。是故諸佛色目奸偽。同名讒賊。菩薩見詐。如畏豺狼。我與眾等。無始至今。而宛不知。詐偽豺狼。讒人如是。反趁夙習。徧起諂佞。倚仗豪門。顛覆良第。不任忠信。偏詐無辜。遞相誘引。非作非為。捨於八正。邪命邪求。亡身喪命。俱係詐緣。如是等因。造無量罪。終招苦果。無由出離。故我今日。恭對聖賢。求哀懺悔。唯願三寶。地藏慈尊。哀憐攝受

。證我披陳。上來五習。等一消除。三昧總持。入那伽定。禪波羅蜜。舉念具足。究竟菩提。發無礙辯。樂說無盡。廣接有情。出輪迴海。同登彼岸。過難勝地。證佛無為。現前眾等。相與志心。等一痛切。皈命敬禮一切諸佛。

南無釋迦牟尼佛

南無金剛不壞佛

南無金寶光佛

南無金龍尊佛

南無精進軍佛

南無精進喜佛

南無寶火光佛

南無寶月光佛

南無現無愚佛

南無寶月佛

南無文殊師利菩薩

南無普賢菩薩

南無師子旛菩薩

南無師子作菩薩

南無虛空藏菩薩

南無觀世音菩薩

南無地藏王菩薩摩訶薩

禮諸佛已。次復懺悔。第六者誑習交誣。誣妄不止。心欺造奸。則有塵穢屎尿污言。如塵隨風。各無所見。沉溺騰躍。飛墜漂淪苦報等事。是故諸佛色目欺誑。如同劫賊。菩薩見誑。猶踐蛇虺。我與眾等。從無始來。至於今日。而尤不知欺誑蛇虺。曾未遠離。或隨誑習。心計異端。口發誣言。見言不見。聞言不聞。知言不知。作言不作。面是背非。哄騙無知。背恩負義。而親不親。誑妄說法。瞞昧愚倫。言已則高登聖位。毀他則墮在凡夫。而不知自入見坑。牽人入獄。

將招苦報。無量無邊。若不懺悔。焉可滅除。是故今日。恭對諸佛。一一披陳。求哀懺悔。從今已往。真實修行。智慧現前。滿波羅蜜。真語實語。不誑不欺。精進菩提。悟心地藏。

第七怨習交嫌。發於銜恨。由忿為先。懷惡不怠。結怨為性。不能含忍。熱惱奮馳。則有投辭控訴。訟及公庭。故即飛石。投礮。匣貯。車檻。甕盛。囊幘。如陰毒人。懷抱畜惡。報有投擲擒捉。擊刺拋撮無間等事。是故諸佛色目怨恨。同違害鬼。菩薩見怨。如飲鳩酒。我及眾生。無始至今。而實不知怨恨鳩酒。醉無明家。怨習交嫌。相啣相恨。結怨結仇。或父母邊。忤逆不孝。兄弟姊妹。姑姨伯叔。眷屬良朋。師僧共住。違教弗訓。如是嫌恨。未得懺除。故我今日。仰對三寶。地藏慈尊。鑒我生來所有怨仇。悉皆消滅。未結怨業。不敢復作。智慧遠行。應念成就。方便波羅蜜。真實證其中。具足神力。應化十方。度諸有漏。到涅槃山。

第八見習交明。發於相違。相違不止。便懷戒禁。邪悟諸見。相反出生。如是即有主吏官曹。辨正文詞。考詢邪偽。如行路人。往來相見。是見習交。報有勘問權衡。推案察訪。對鏡照明。承認允伏。善惡判官。及諸童子。手執文券。辯析謠訛。詢訊等事。是故諸佛色目邪見。同名見坑。菩薩見諸虛妄。徧計徧執。如臨毒壑。我與眾等。無始來今。而竟

不知。邪見交明。真似毒壑。於諸諦理。妄計博度。執我我所。起諸邪見。著斷著常。著空著有。戒取見取。隨事生心。撥無因果。妄舉邪緣。謂是正道。更有迷明。投崖拔髮。嘗穢臥薪。捨身誤為。無益苦行。及至命終。直墮無間。如是見業。曾或有之。故我今日。恭對十方調御。皈命地藏慈尊。懺悔邪見邪思。頃成正知正見。我與眾等。正心不動。八地高登。願波羅蜜。一生成就。等與含生。咸階聖果。俱悟無為。同歸秘藏。

第九枉習者。枉習交加。發於欺誑。由欺謗故。內無實心。譽人以善。惟恐不至於天。毀人以惡。尤慮不及於淵。譏毀良善。貶斥沙門。志不忠貞。心存虛偽。如是故有合山礪石。碾磴耕磨。如讒賊人。逼枉賢良。枉習相排。以有捺撻按蹙。衡度諸事。是故諸佛色目怨謗。同名讒虎。菩薩見枉。如遭霹靂。我與眾等。無始來今。而更不知。枉習欺謗。的如讒虎。或以枉法。誣陷親朋。讒害師僧。及餘人輩。心無慈忍。慘刻無辜。鰥寡孤獨。橫罹奇殃。致死含冤。難可申訴。如是怨謗。業相無邊。故我今者。正意誠心。恭對聖筵。發露懺悔。所有枉習。悉使冰消。行願成就力波羅蜜。不興惡念。更造三途。永攝人天。當修善慧。引導有情。同皈正覺。

第十懺悔訟習者。訟習交誼。發於藏覆。不能隱惡揚善。而

反嫉善妒能。發宣隱惡。使彼難容。唯恐我不勝人。人便勝我。意氣剛愎。旁若無人。自作之罪。不使伊聞。他違常儀。志願宣布。如是故有鑒證分明。不自藏影。如人日中。毛髮自露。故有業鏡火珠。披露宿業對驗等事。是故諸佛色目覆藏。同名陰賊。菩薩見覆。如戴高山。履於巨海。我與眾等。自從無始。迄於今生。而終不知。訟習妄緣。藏護瑕玼。包含過失。言己。則無德不歸。說他。則何惡不有。氣質嬌傲。目空無人。喧及公私。言辭巧構。經年累世。無有罷期。又復發誼私忿。彰露惡形。不顧身命。何憐家室。心心相續。意在前人。念念無窮。唯圖快己。如是因緣。皆由掉舉。致成重喧。展轉相應。會無暫輟。故我今日。恭對世尊。地藏菩薩。始從淫習。終至訟誼。是十習因。造百千業。及至地獄。六受交報。及與三途。無不由之。一一披陳。重重懺悔。願佛菩薩。傾大甘露。沃滅習因。慧燄光明。爍破癡暗。行願成就。禪觀精深。智波羅蜜。皆悉圓滿。法雲徧界。普蔭群機。法雨滋霑。同明道種。修菩薩之願力。證無上之菩提。究竟圓成十地妙行。相與志心。等一痛切。五體投地。如泰山崩。皈命頂禮。一切諸佛。

南無釋迦牟尼佛

南無無量壽佛

南無無垢佛

南無離垢佛

南無勇施佛

南無清淨佛

南無清淨施佛

南無娑留那佛

南無水天佛

南無堅德佛

南無旃檀功德佛

南無無量掬光佛

南無文殊師利菩薩

南無普賢菩薩

南無觀世音菩薩

南無金剛藏菩薩

南無無盡意菩薩

南無定自在王菩薩

南無地藏王菩薩

禮諸佛已。次復懺悔。向來已懺煩惱障竟。次悔業障。今當懺悔報障。經云。假使百千劫。善惡業不亡。因緣會遇時。果報還自受。故知習因業果。招感不差。所以世尊而示金鎗馬麥。木槩頭疼。以斯令人灼然可式。何以知然。天上五衰相現。懺之即脫豬身。人間五逆報熟。悔之頓除獄報。如斯等類。彌徧經文。故知懺悔。實能滅禍。而我凡夫。以無道眼。安辨因果。唯逐六塵。勾引六識。趁外六境。起內六妄。徧造十惡。迷失一真。罪既憑六根而互造。苦還依六識以交嬰。云何名六。一者眼根見業。招引惡果。斯見交報。是人將終。先見猛火。彌燄燒空。亡者神識。乘煙飛墜。入無間中。發明二相。一者明見。徧見惡物。刀山岌岌。劍樹峩峩。亡者神識。生無量畏。二者暗見。寂然不見。亡者神識。心生恐怖。如是見火。燒見。則為明暗。恐怖之色。燒聽。則為鑊湯融銅。振響之聲。燒嗅。則為黑煙紫霧之氣。燒舌。則為焦丸鐵糜之味。燒身。則為石灰爐炭之觸。燒心。則為星火迸灑。鼓煽不息之思。如是六種。一時交受。皆由

昔者眼貪幻色。今報如是。伊不懺謝。何有出離。而我眾等。無始來今。或貪幻色。心著妄塵。玄黃朱紫。紅綠鮫綃。珍奇寶玩。男女容顏。馳境好迷。起非法想。造惡無窮。招報如上。故於今日。恭對三寶。地藏慈尊。懺悔往業。從今日去。攝心內照。不逐外塵。實境現前。見淨妙色。發真觀智。不染習因。得如所願。滿菩提果。

二者懺悔聞報。由妄聞習。招引惡愆。此聞業交。臨命終時。先見波濤。沒溺天地。亡者神識。降注乘流。入無間中。發明二相。一是開聽。聽種種鬧。精神愁亂。二者閉聽。寂然無聞。幽魄沉沒。如是聞波。注聞。則能為責為詰。注見。則能為雷為吼。注息。則能為雨為霧。灑諸毒蟲。周徧滿身。注味。則能為膿為血。種種雜穢。注觸。則能為畜為鬼。為屎為尿。注意。則能為雹為霰。摧碎心魄。如是皆由耳根造業。招報而然。我與眾等。無始來今。或為音惑。宮商絃管。吳歌鄭聲。檀板演劇。男女優伶。妖嬈曲調。種種淫詞。著境迷心。起非法想。造罪無邊。當報如上。故於今日。發露披陳。求哀懺悔。乘此聞熏。俾我耳聞法身之妙理。仗今懺法。即成般若解脫之圓音。普化有情。同歸寂忍。

三者嗅報交時。齎習業熟。其人命終。先見毒氣。充滿遠近。亡者神識。從地湧出。入無間中。發明二相。一是通嗅。被諸惡氣。熏極心擾。二者塞嗅。氣掩不通。悶絕於地。如

是嗅氣。衝息。則能為質為履。衝見。則能為火為炬。衝聞。則能為沒為溺。為洋。為沸。衝味。則能為餒為爽。衝觸。則能為綻為爛。為大肉山。有百千蟲。咸來啣食。衝思。則能為灰為瘴。為飛砂礫。擊碎身體。如是嗅業。妄報如向。我與眾等。從無始來。至於今日。或為鼻惑。造眾過愆。或貪諸香。沉檀降速。牛首蘇合。麝臍龍腦。雞舌馬蹄。男女身分。姿態嬌柔。徧逐幻塵。造諸觸業。果報熟時。將何可免。是故今日恭對三寶。求哀懺悔。從今已去。盡未來際。安那般那。常聞五分法身之香。捨生受生。永離生死臭穢之氣。頓絕塵氛。長增法味。止觀定慧。十境圓明。一息無妄。潛通十地。

四者嗜味。招引惡果。斯味報滿。其人命終。先見鐵網。熾火交煎。周幔世界。亡者神識。下透鐵網。倒挂其頭。入無間中。發明二相。一者吸氣。結成寒冰。凍冽身肉。二者吐氣。飛為猛火。焦爛骨髓。如是味報。歷嘗。則能為承為忍。歷見。則能為然金石。歷聽。則能為刀兵刃。歷息。則能為大鐵籠。彌覆國土。歷觸。則能為弓為矢。為弩為剗。歷思。則能為飛熱鐵。從空雨下。頭入足出。如是味報。皆伊過去。不信佛法。妄說聖言。貪食酒肉。感報而然。我與眾等。無始來今。或貪眾生血肉。鮮美甘肥。妄資四大。更增苦本。烹竈染指。而興父子之仇。恬酒驚心。頓起君臣之絕。因味造業。如是愆尤。而我釋子沙門。豈得貪味類爾。是

故今日。恭對聖賢。盡情懺悔。願從今去。蔬食自節。羶穢遠離。禪悅恆餐。法喜飽餐。四辯宣揚。八音敷奏。應機說法。慧命延鴻。等與含生。同超味著。

五者觸報。招引惡果。觸業熟時。是人將終。先見大山四面來合。無復出路。亡者神識。見大鐵城。火蛇火狗。獅象虎狼。牛頭馬面。手執鐵稍。驅入城門。向無間中。發明二相。一是合觸。合山逼體。骨肉血潰。二者離觸。刀劍鋸身。心肝屠裂。如是合觸。則能為道為觀。為廳為案。歷見。則能為燒為然。歷聽。則能為擊為撞。為刺為射。歷息。則能為括為袋為拷為縛。歷嘗。則能為耕為鉗為斬為絕。歷思。則能為墜為飛。為煎為炙。觸業招報。交受如是。我與眾等。自無始來。或貪花綺。錦繡繒縠。獸毛蠶口。毳氎皮靴。吳綾蜀錦。椒繭狐裘。七珍麗服。細滑紬裳。觸境迷心。起非法想。如是罪惡。無量無邊。故於今辰。恭對三寶。一一披陳。求哀懺悔。從今已去。披忍辱鎧。踞法空座。入慈悲室。普化有情。同登覺岸。

六者意業招報。此意業交。其人命終。先見惡風。吹壞國土。亡者神識。被吹上空。乘風旋落。入無間中。發明二相。一是不覺。迷極則慌。奔走不停。二是不迷。覺知則苦。無量煎燒。痛深難忍。如是邪思。結想。則能為方為所。結見。則能為鐵鏡臺。為鑒為證。結聽。則能為大合石。為冰為

霜。為土為霧。結息。則為大火車輪。火船火檻。結嘗。為大叫喚。為悔為泣。結觸。則能為大為小。為一日中。萬死萬生。為偃為仰。如是六種。名曰交報。皆是眾生迷妄所起。三毒為因。十習為緣。因緣交遘。果報共成。則知虛妄造業。虛妄受報。皆是空華。亂翳實性。然於理境。曾未乖張。妄想發生。於菩提心。恆非本有。是故我等。既是凡夫。寧知聖道。或因三毒而起惑。或因十習以積愆。或從六根而造罪。必墮四趣以輪迴。是故我今。求哀懺悔。仰願十方三寶。十輪地藏慈尊。放淨光明。照燭我等。所有愆尤。自他冰釋。願乘今之懺力。增道損生。究竟安樂。以金剛智。照破無明。心地秘藏。應念圓成。同佛十力。四無所畏。十八不共。無量功德。具足六通。三達洞明。廣宣四辯。度盡眾生。然後入滅。志心懺悔。發願已。皈命禮常住三寶。

慈悲地藏懺法卷中

離婆離婆帝 求訶求訶帝 陀羅尼帝 尼訶囉帝 毗黎你帝
摩訶伽帝 真陵乾帝 娑婆訶 (七遍)

南無喝囉怛那 哆囉夜耶 佉囉佉囉 俱住俱住 摩囉摩囉
虎囉 吽 賀賀 蘇怛拏 吽 潑抹拏 娑婆訶 (三遍)

唵 鉢囉末鄰陀寧 娑婆訶 (七遍)

讚

十因妄習 造罪如山 六根交報墮無間
受苦有誰憐 頂禮慈顏 因果自酬還
南無地藏王菩薩摩訶薩 (三稱)